



## **El *Día de les Lletres Asturianes* celebraráse'l 2 d'ochobre, siempre que se dean les condiciones sanitaries y sociales**

L'Academia de la Llingua Asturiana (ALLA) anunciaba va unes selmanes que'l *Día de les Lletres Asturianes*, qu'habría celebrase esti viernes 8 de mayu, quedaba aplazáu por cuenta de la crisis sanitaria.

D'alcuerdu cola Conseyería de Cultura, Política Llingüística y Turismu y cola Dirección Xeneral de Política Llingüística del Gobiernu d'Asturies, l'Academia camentó que la situación provocada pol coronavirus COVID-19 aconseyaba l'aplazamientu de tolos actos previstos pa la *Selmana y el Día de les Lletres Asturianes* hasta la seronda. Agora, l'alcuerdu ente dambes partes apurre unes feches posibles, siempre que se dean les condiciones sanitaries y sociales y afayadices: del 28 de setiembre al 2 d'ochobre pa la *Selmana y el Día de les Lletres Asturianes*.

L'ALLA, que yá tenía bien avanzada la xera organizativa del cuarentenu primer *Día de les Lletres Asturianes* –y n'onde, ente otro, taba programada la entrega del II Premiu Nacional de Lliteratura al escritor Xuan Xosé Sánchez Vicente–, anuncia un actu institucional de carauterístiques estremaes a les avezaes, axustáu al contestu preventivu d'anguño.

Uviéu, 6 de mayu de 2020

**ACADEMIA DE LA LLINGUA ASTURIANA**

